



Moyse demande à voir la gloire du Seigneur; puis ayant fait deux autres tables, il monte à la montagne, & y ayant esté quarante iours, retourne vers le peuple d'Israël

MOYSE ayant parlé quelque temps avec le Seigneur, & voyant qu'il auoit trouué grace deuant luy, il luy dist, Montre-moy ta gloire, A quoy le Seigneur répondit, Tu ne pourras voir ma face, car l'homme ne me verra point, & viura; mais voicy le lieu est aupres de moy, & tu t'arresteras sur la pierre: & quand ma gloire passera, ie te mettray au pertuis de la pierre, & te couuriray de ma main droite tandis que ie passeray, puis ie retireray ma main, & tu me verras par derriere, mais tu ne pourras voir ma face. Apres ces choses faites, Moyse par le commandement de Dieu, aplanit deux tables de pierre comme les premieres qu'il auoit rompuës, & se leuant de nuit monta en la montagne de Sinai, ainsi que le Seigneur luy auoit commandé, portant avec soy les tables. Et quand le Seigneur fut descendu en la nuée, Moyse s'arresta avec luy, & receut de luy ses commandemens & ordonnances, & écriuit es tables les dix paroles de l'Alliance; & ayant esté avec Dieu quarante iours & quarante nuits, il descendit de la montagne, tenant les deux tables du témoignage, & ignoroit que sa face fust luisante pour auoir parlementé avec le Seigneur. Lors Aaron & les enfans d'Israël voyans la face de Moyse cornuë, ils craignirent d'approcher de luy: Mais s'estans approchez de luy par son commandement, il leur annonça toutes les choses qu'il auoit entenduës du Seigneur en la montagne de Sinai. Et ayant acheué de parler, il mit vn voile sur sa face, qu'il ostoit entrant au Tabernacle, & parlant au Seigneur iusques à ce qu'il en sortist, mais il le remettoit quand il parloit au peuple d'Israël.